

■ COLUMNA

Daco che Federer ei la numera 1 e la naziunala da ballabei ha disgiu

DA GION CAVIEZEL

Sco vus saveis fa Roger Sadina vacanzas el Grischun. In unviern ha el passentau cun sia famiglia en mia casa da vacanzas. Ina damaun hai jeu fatg termagls cun ses schumelins e raquintau ch'jeu mondi suenter cun skis. Cun in'ureglia audel jeu co il bab da Roger giappa el telefonin: Crisa, il dies, la carriera da tennis alla fin. «Vegn zatgi cun mei cun skis?» damondel jeu. Roger mira sin mei, il bab ei aunc adina al telefonin, cheu dat Roger il tgau: «Jeu vegn!»

El tshaler gi Roger: «Naturalmein astgel jeu buc ir cun skis, pervia da blessuras, jeu savess pigliar freid, jeu astgel buca quei e buca tschei. Ei tonscha!» Lu damonda el: «Muossas a mi in pèr trics?»

Jeu less saver sch'el survegna buca malempereivladads. El trai la schuiala: «Quei ei tuttina a mi. Jeu less semplamein puspei inagada far zatgei auter.»

Nus essan bunamein ils emprems sin pista, igl ei quiet, el horizont tarlischia il sulegl, la neiv ei leva sco plemas e cun mintga smenada sprezza la neiv sco ina fontena ell'aria. Las pistas ein super. Jeu dun in



tec tempo e clomel: «Lai ir, lai ir ils skis.»

Nus mein tras igl uaul, neiv croda dals roms, l'aria frestga peztga ella fatscha. Cul lift sin il péz. Quella gada va Roger ordavon, el sa veramein ir cun skis, halt in sportist, mintgaton in tec memia spert, per cletg ha ei mo pouca glied sin las pistas. Jeu varghel e muossel cul fest sin ina senda stretga. «Ina pista speciala?» Ed el vegn suenter mei. Igl ei in si e giu, denter coniferas e caglias, ina schanza pintga, in segl. Cuorta pausa, el ri sur l'entira fatscha.

Jeu sai buc exact pli la via, sundel buca segirs, nua ch'ei va vinavon. Fa nuot, zaco vegnin nus schon sin la pista regulara. Tuttenina vesel jeu il lift, mo ei va buca vinavon pli. Ei mass schon, mo ei fuss in segl da silmeins tschun meters ella bassa. Jeu mirel sin Roger: «Jeu muossel co ei va! Buca

memia bia tempo, schar curdar, trai da star locker.»

Jeu mon sco εμπrem, in tempo moderat, la canta e sin ina gada nuot pli sut ils skis, jeu sgoel, il magun sesaulza, jeu stoi tener la ballontscha cun la bratscha, lura setschentel ella neiv, tut ei alv entuorn mei, sai buca sch'jeu stun aunc sin ils skis, l'aria vegn cumprimida en miu lom. Finalmein dun jeu in griu da legria. Jeu vesel co Roger seglia sur la canta, in mument stat el eri ell'aria, lura til'ei el en la profunditad, el svanescha bunamein ella neiv entira e cun la posadad in winner vegn el tier mei. «Super, quei ei stau cool. Schon ditg buca giu aschi bia plascher – e duvrau aschi bia curascha.»

Sche jeu seregordel endretg, ha el suenter puspei gudignau el tennis. En ils commentaris han ins scret ch'el gioghi puspei cun anim, el ughegi puspei enzatgei, era battidas nunprevidas. Cuort: El hagi puspei plascher vil il tennis.

La squadra naziunala da ballapei duess era far vacanzas cheu tier nus el Grischun. Jeu mass era cun skis cun els e lu, lu sun jeu segirs, gudognan els era encunter ils Sveds.